

ԱՆԱՆԻԱ ՇԻՐԱԿԱՑԻՆ ԵՎ ՎԱՂ ՄԻՋՆԱԴԱՐՅԱՆ ՀԱՅ ՀՈԳԵՎՈՐ ՄՇԱԿՈՒՅԹԸ

Ռ.Ա. Միրումյան
փիլիսոփայական գիտությունների դոկտոր, պրոֆեսոր

*Գրիւ օրէնքս ո՛չ ընդդէմ են բնական իմաստութեան,
ապա եթէ միաբանութիւն է, դաստիարակ եղեն
մեզ առաջի իմաստասէրքն, զի նոցա տես
քննութեամբն յորոց ճշմարիտքն ասացան:
Եվ մեր հոգեւոր հարանցն առաջնոցն ընկալեալ
ի նոցանէ զտրամազիր ասացեալսն:*

Անանիա Շիրակացի

Նորությունը պաշտամունքի վերածած արդի ժամանակաշրջանում տարիմաստ է թվում ազգի պատմական անցյալին, այդ թվում նաև նրա գիտափիլիսոփայական մտքի պատմությանը դիմելը: Սակայն, իր «ներքին կարգով» ազգի հոգևոր մշակույթի, իսկ դրա սահմաններում նաև գիտափիլիսոփայական մտքի պատմությունը, ըստ էության, ժամանակի մեջ աշխարհի և մարդու մասին նույն ազգի կողմից նախկինում ստեղծված պատկերացումների ծավալումն է: Այդ իսկ պատճառով Արդիականության մարտահրավերների համարժեք պատասխանները նախ և առաջ որոնելի են ազգի պատմամշակութային ժառանգության մեջ¹: Վերջինս նպաստում է նաև ազգի հոգևոր մշակույթի կենսունակությանը, իսկ այդ հենքի վրա՝ ազգի պատմական հեռանկարի սահմանմանը: Ազգի պատմական անցյալը նրա՝ իբրև կուլ ընդհանրության, կարևորագույն հիմքն է:

Յուրաքանչյուր ազգի մշակույթի հիմքում ընկած են նույն ազգի կողմից պատմականորեն ձևավորված կենսական կողմնորոշիչները, աշխարհագրաշրջության տարատեսակը, որոնք ազգի պատմական գոյության ամեն մի փուլում արտացոլում են նույն ազգի ինքնագիտակցության մակարդակը: Մշակույթն ապահովում է ազգի միասնության համար անհրաժեշտ հոգևոր կապը, որը ծնունդ է տալիս ժողովրդի պատմական հիշողությանը և պահպանում այն: Ազգի մշակութային արժեհամակարգը համահարաբերական է այդ մշակույթի կրողների ողջ հոգևոր կարգին: Դրանով է բացատրելի այն հանգամանքը, որ

հենց այդ արժեքները ստեղծած ժողովրդի պատմական հիշողությունը որոշակի իմաստ է հաղորդում այդ արժեքներին և ներգրում դրանք մարդկության հոգևոր ժառանգության պահոցի մեջ²:

Ազգի հոգևոր մշակույթի (ժողովրդական բանահյուսությունից մինչև փիլիսոփայություն և գիտություն) ձևավորումը համահարաբերական է ազգի պատմական գիտակցության առաջացմանն ու զարգացմանը: Համապատասխանաբար, ազգի հոգևոր մշակույթի և անգամ նրա առանձին ոլորտների՝ փիլիսոփայության և գիտության) ձևավորման շարժընթացի հետազոտումը հնարավորություն է ընձեռում բացահայտել ազգի ներքին, հոգևոր կյանքի աստիճանական ծավալման սահմանները, դրանով իսկ նաև ազգի պատմական գիտակցության հիմքն ու միտվածությունը: Լինելով ազգային մշակույթի աշխարհայացքային բնութագրումը՝ յուրաքանչյուր ազգի պատմական գիտակցությունը (պատմափիլիսոփայությունը) նույն ազգի ինքնաճանաչման, այն է՝ սեփական ստեղծագործական, հոգևոր ներուճակության գիտակցման արտահայտությունն է: Ազգի պատմափիլիսոփայությունը բովանդակում է ազգային մշակույթի ներքին խորհուրդը՝ ազգի գոյության բացարձակ (իդեալական) իմաստի, հետևապես՝ նաև նրա պատմական հեռանկարի սահմանումը: Այս տեսանկյունից հետաքրքրական է հայոց գիտափիլիսոփայական մտքի ձևավորման ժամանակաշրջանը (V-VII դդ.), որի սահմաններում տեղի է ունեցել Հայաստանում հեթանոսական աշխարհայեցողության «հաղթահարումը» և քրիստոնեական գաղափարաբանության առաջացումն ու ամրապնդումը: Նորաստեղծ հայ տեսական միտքը կոչված էր վերաիմաստավորել բազմադարյան հայ հոգևոր մշակույթի ավանդույթները քրիստոնեական աշխարհըմբռնման համատեքստում, դրանով իսկ նպաստել ազգային գիտափիլիսոփայական մտքի զարգացման շարժընթացին: Այս շարժընթացի մեջ առանձնակի դերակատարություն է ունեցել VII դ. հայ մտածող Անանիա Շիրակացին, որի գիտափիլիսոփայական համակարգում «համատեղվել» են անտիկ և ազգային գիտափիլիսոփայական մտքի արդյունքները՝ ներգրվելով քրիստոնեական աշխարհըմբռնման մեջ:

Անտիկ և հայ ազգային-մշակութային ավանդույթների համադրման Անանիա Շիրակացու կատարած վիթխարի փորձը, ըստ էության, շարունակությունն էր այն միտման, որը իրականացվել էր V դ. առաջին կեսին հայ հայրաբանների (Սեսրոպ Սաշտոց, Եզնիկ Կողբացի, Եղի-

շե), իսկ V դ. երկրորդ կեսին - VI դարում հունաբան դպրոցի (Եղիշե, Դավիթ Անհաղթ) կողմից: Հայրաբանները քրիստոնեական վարդապետության բանական հիմնավորման նպատակով դիմում էին նաև անտիկ գիտափիլիսոփայական ավանդույթներին, բնության երևույթների դիտարկմանն ու զգայական փորձի անտիկ շրջանում ձեռք բերած արդյունքներին: Հունաբանները, իրենց հերթին, անտիկ փիլիսոփայությունից շարժվում էին դեպի միաստվածության գաղափարը:

Հայ հայրաբանների և հունաբանների արդյունքների համադրումը իրականացրեց Անանիա Շիրակացին, «յուրովի վերաիմաստավորելով և արժեվորելով անտիկ և ազգային գիտության և փիլիսոփայության նվաճումները»³: Բնավ պատահական չի թվում այն հանգամանքը, որ հայ փիլիսոփայության պատմության մեջ Անանիա Շիրակացին «գրանցվել» է նախ որպես բնագիտական ուղղության հիմնադիր: Անանիա Շիրակացու «բնաբանական ուսմունքը» գիտափիլիսոփայական մտքի զարգացման նախորդ փուլերի վերաիմաստավորման ու արժևորման արդյունք է:

Այս ճանապարհին Շիրակացու կատարած առաջին քայլը հեթանոսական որոշ ուսմունքների ու քրիստոնեական աշխարհըմբռնման միջև կապ հաստատելն էր: Նրա ըմբռնմամբ անտիկ շրջանում ձեռք բերված գիտելիքը հնարավոր է ներգրել քրիստոնեական տեսական մտքի մեջ, քանզի Ս.Գրքի օրենքները չեն հակասում բնական (հեթանոսական) իմաստությանը: Այս տեսակետից է արժևորելի մտածողի այն միտքը, թե հայերի առաջին հոգևոր հայրերը «վերցրին նրանցից (հեթանոսական շրջանի իմաստասերներից .-Ռ.Մ) ճշմարտության խոսքերը, որպեսզի երկու կողմերով՝ [իմաստության] արմատով և ծայրերով, պահեն մեզ աստվածային հավատքի մեջ, որպեսզի մենք հագնանք (ծառի) ծայրերի պտուղներով և հաստատուն արմատի շնորհիվ միշտ ծաղկենք և պտղաբերենք գիտության մեջ»: Այսպիսով՝ Շիրակացին հաստատում է մարդկային գիտելիքի ժառանգորդման սկզբունքը, որի շնորհիվ հին հունական գիտական գիտելիքը վերածվում է հայ ազգի ինքնըմբռնման և աշխարհի ճանաչման կոմանի: Անանիայի բնափիլիսոփայական աշխարհայացքի մեջ ուրվագծվում է պատմության մեջ ազգի «ինքնորոշման» միտումը: Վերջինս նկատելի է նաև միջնադարյան հայ բնագիտական մտքի մի շարք ներկայացուցիչների աշխարհայեցողության մեջ (Գրիգոր Սագիստրոս, X-XI-դդ., Հովհաննես Սարկավազ Իմաստասեր, XI-XII-դդ., Հովհաննես Երզն-

կացի Պլուզ, XIII-դ., Հովման Որոտնեցի, XIV-դ., Գրիգոր Տաթևացի, XIV-XV-դդ.:

Նրանց համոզմամբ, անտիկ շրջանի գիտության և փիլիսոփայության մվաճումները աշխարհի իմացության անհրաժեշտ մի փուլ էր, որը նախապատրաստում էր քրիստոնեական հավատքի համարժեք ընկալումը և քրիստոնեական վարդապետության մշակումը: Այս տեսակետից ըմբռնելի է այն փաստը, որ Աստծո գոյության տիեզերաբանական ապացուցման Արիստոտելի տեսությունը «գրավիչ» էր այն հայ աստվածաբանների համար, որոնք հակված էին աշխարհի բնագիտական ճանաչողությանը: Բացի այս, աշխարհի ճանաչողությունը դառնում է անհրաժեշտ, քանզի դա Աստծուն ճանաչելու, այն է՝ նրա գոյությունը ընդունելու, միակ միջոցն է: Իսկ քանի որ արարված տիեզերքը ունի հարաբերականորեն ինքնության գոյություն, ապա հարաբերականորեն ինքնուրույնություն պետք է ձեռք բերի նաև՝ տիեզերքի (բնության) մասին գիտությունը:

Ըստ Շիրակացու, Աստծո էության իմացության առումով մարդու ճանաչող բանականությունը սահմանափակ է: Մարդու ճանաչող բանականությունը, սակայն, ընդունակ է ճանաչել արարված աշխարհը: Բանն այն է, որ միջնադարյան մտածողության սահմաններում «աստվածային էություն» հասկացությունը համահարաբերական էր «աստվածային ճշմարտություն» հասկացությանը: Հետևաբար, ճանաչել աստվածային էությունը նշանակում էր բացահայտել աստվածային ճշմարտությունը:

Հարկ է նշել, որ Անանիա Շիրակացու այս դիրքորոշումը ներդաշնակում էր արևելաքրիստոնեական եկեղեցու մեծ հայրերի աշխարհայեցողությանը, որում փորձ է արվել վերաիմաստավորել անտիկ գիտությունն ու փիլիսոփայությունը: Մյուս կողմից, նման մոտեցումը անհրաժեշտ է բնութագրել որպես աշխարհայացքային և մեթոդաբանական հիմք ազգային – մշակութային դաշտում «բնության փիլիսոփայություն» ստեղծելու համար: Եթե արարված աշխարհն ունի հարաբերականորեն ինքնուրույն գոյություն, ապա բնության մասին գիտությունը անհրաժեշտորեն ձեռք է բերում հարաբերականորեն ինքնուրույն կարգավիճակ:

Հիմնվելով անտիկ (Պլատոն, Արիստոտել) տիեզերաբանական ուսմունքների, Ս.Գրքի տեքստերի և դասական հայրաբանության և առաջին հերթին՝ «կապաղովկյան դպրոցի» կողմից մշակված գաղափա-

րադրույթների վրա, հայ մտածողը ստեղծում է աստվածակենտրոն տիեզերաբանական մի մոդել, որի նմանօրինակը արևմտաեվրոպական տիեզերաբանության մեջ առաջադրվեց միայն XIII-XIV դարերում: Խնդիրն այն է, որ անտիկ տիեզերաբանության առանցքը տիեզերքի կառուցվածքի ու նրա կառուցվածքային միավորների հիմնախնդիրն էր, որի նշանակությունը պահպանվեց նաև քրիստոնեության մեջ:

Ընդհանուր կառուցվածքի առումով տիեզերքը Անանիա Շիրակացու հայեցակարգում բաղկացած է Մեծ՝ հոգևոր և Փոքր՝ ֆիզիկական տիեզերքներից: Իբրև ինքնուրույն կառուցվածքային մարմին դրանց միջև առկա է «վերին երկինքը», որը հավասարապես պատկանում է ինչպես Մեծ, այնպես էլ Փոքր տիեզերքներին: Եռաստիճան այս տիեզերքի երկրորդ աստիճանը Անանիա Շիրակացու դատողություններում աշխարհայացքային կարևոր նշանակություն ունեցող աստիճանն է: Սահմանելով ֆիզիկական տիեզերքի տարածությունը՝ Անանիա Շիրակացին այն դուրս է բերում բուն ֆիզիկական տարածությունից և իր գոյությամբ պայմանավորում ֆիզիկական տարածությունն ու ֆիզիկական ժամանակը, ինչպես նաև ֆիզիկական տիեզերքի սահմաններում տեղի ունեցող գործընթացները: Միաժամանակ արարված լինելով հավիտենության մեջ՝ այն ամբողջապես չի պատկանում նաև Մեծ տիեզերքին, հավիտենությանը, այլ համարվում է «առանձնակի մարմին»⁴:

Հետևելով անտիկ շրջանում ձևավորված ավանդույթին՝ բուն ֆիզիկական տիեզերքի կառուցվածքը Անանիա Շիրակացին բնութագրում է տարրաբանական պատկերի միջոցով: Ըստ դրա՝ տիեզերքը բաղկացած է մեկ տարրից: Շիրակացին առանձնացնում է չորս կառուցվածքային մասեր (հրային, օդային, ջրային և հողային), որոնք համապատասխանում են բնության չորս տարրերին:

Անանիա Շիրակացու աշխարհի «բնաբանական պատկերը» հիմնված է տարրերի մասին անտիկ բնափիլիսոփայական մտքի վրա:

Աշխարհի ստեղծումը, Տիեզերքի առաջացման ընթացքը Շիրակացին սահմանում է իբրև հարաբերականորեն ինքնուրույն և «բնական» գործողություն: Արարչագործությունից հետո նյութական աշխարհում նկատելի է իրերի և երևույթների անվերջ գոյացում և ոչնչացում, ինչը բնական համակարգի գոյության և պահպանման կարևորագույն օրենքն է: Փաստորեն հայ իրականության մեջ Շիրակացին առաջին հայ

մտածողն էր, որը շարադրեց և մեկնաբանեց արիստոտելյան ուսմունքը չորս տարրերի մասին:

Շիրակացու տեսական ժառանգությունը, որը բովանդակում է իր ժամանակի մաթեմատիկական և բնագիտական գիտելիքի գրեթե բոլոր բնագավառները (տիեզերագիտություն, քվաբանություն, աստղաբաշխություն, երաժշտության տեսություն, չափագիտություն, աշխարհագրություն և այլն), սկսել են ուսումնասիրել դեռևս XIX դ. հայազգի և օտար հայագետները՝ Գ. Տեր-Մկրտչյանը, Զ. Պատկանյանը, Ղ. Ալիշանը, Ֆ. Զոնիբերը, Զանս Մժիկը և այլոք: Շիրակացու ժառանգությունը հետաքրքրել է նաև Զ. Օրբելուն: Փիլիսոփայապատմական և գիտապատմական տեսակետից Անանիայի աշխատությունները ուսումնասիրվել են Զ. Գաբրիելյանի, Վ. Զալոյանի, Գ. Խրլոպյանի, Ս. Արևշատյանի և Կ. Միրունյանի կողմից: Անանիա Շիրակացու թողած ժառանգության նկատմամբ հետաքրքրությունը չի մարում նաև այսօր, քանզի այն ունի ոչ միայն պատմամշակութային մեծ արժեք, այլև արդիական հնչեղություն:

Դա պայմանավորված է նաև այն հանգամանքով, որ հայ հոգևոր մշակույթի պատմության մեջ Անանիա Շիրակացին մտել է նաև որպես հայ մեծ լուսավորիչ և մանկավարժ: Իր ժամանակի Զայաստանում նա հիմնել է բարձր տիպի դպրոց սեփական բազմատեսակ և հարուստ գիտելիքը հայորդիներին փոխանցելու նպատակով: Այդ դպրոցի ուսումնական ծրագրի հիմքը կազմում էին մաթեմատիկական և բնագիտական առարկաները («քառյակ գիտություններ»): Դպրոցի հիմնադրմամբ Շիրակացին ձգտում էր լրացնել ազգի մշակութային կյանքում առկա այս բացը: Դրա հետ մեկտեղ նա ստեղծում է իր ժամանակի գիտությունների դասակարգումը, որը միջնադարում կազմում էր բարձրագույն դպրոցի ուսումնական ծրագրի հիմքը:

Անանիա Շիրակացու կրթության փիլիսոփայության համար ելակետային է հետևյալ սկզբունքը՝ ամբողջ գոյի իմացությամբ զբաղվող տեսական փիլիսոփայությունը բաժանվում է բնագիտության (ֆիզիկայի), մաթեմատիկայի և մետաֆիզիկայի (աստվածաբանության):

Հիմնվելով Դավիթ Անհաղթի մեթոդաբանության և գիտությունների դասակարգման վրա, Շիրակացին ստեղծում է բնագիտության իր դասակարգումը, որը բովանդակում է մի շարք բնագիտական առարկաներ՝ տեսական բնագիտությունը, ընդ-

հանուր դասընթաց ներկայացնող տիեզերագիտությունը, տեսական և նկարագրական աշխարհագրությունը, գիտական և ժողովորդական օդերևութաբանությունը, տարրաբանությունը (տարրական, ֆիզիկական և տիեզերաբանական առումներով):

Ուշագրավ է նաև այն հանգամանքը, որ մինչև VII դ. հայերը օգտագործում էին շարժական տոմարը, ինչը դժվարություններ էր առաջացնում եկեղեցական տոների համակարգում: Ներսես Մեծի հաջորդի՝ Անաստաս կաթողիկոսի հանձնարարությամբ Շիրակացին ստեղծում է հայկական տոմարի հաստատուն կարգը, «զի միշտ անշարժք լինիցին տօնք տարեկանաց կամ յեղափոխ յեղանակք ժամանակաց»⁵: Դրա հետ մեկտեղ նա համապատասխանեցնում է 15 ժողովուրդների տոմարները՝ 532-ամյա շրջանի համար և կազմում զուգահեռ հուլիական և հայկական տոմարներ:

Հայկական տոմարի ստեղծման անհրաժեշտության գիտակցումն ու մանավանդ դրա «ստեղծագործումը» վկայում է վաղ միջնադարյան Հայաստանի քաղաքակրթական քարձր մակարդակի մասին և միաժամանակ արտացոլում հայ միջնադարյան մշակույթի առանձնահատկությունն ու առաջին հերթին՝ հայերի վերաբերմունքը ժամանակի նկատմամբ: Անանիա Շիրակացու ստեղծած տոմարի մեջ սահմանված ժամանակի չափորոշիչը այդ ժամանակաշրջանի հայ ազգային մշակույթի մեջ իրականացվող բոլոր շարժընթացների ցուցանիշն է: Խնդիրն այն է, որ որոշակի մշակույթի տարածության մեջ վերաբերմունքը ժամանակի նկատմամբ արտահայտվում է նախ և առաջ տոմարի մեջ: Տոմարը, ըստ էության, այն ռիթմն է, որը արտաքին Տիեզերքը ներդաշնակորեն միավորում է մարդու (ազգի) ներքին, այն է հոգևոր Տիեզերքի հետ: Անանիայի անշարժական տոմարի մեջ ժամանակին տրված էր որոշակի ռիթմ՝ պայմանավորված հայ եկեղեցական տոներով և բնական բոլորաշրջաններով («ժամանակի հարափոփոխ եղանակները»): Բացի այս, տոմարը, ըստ էության, ոչ միայն ռիթմն է, այլև հիշողությունը, այն է՝ ազգի ռիթմիկ հիշողությունը: Իսկ 532-ամյա շրջանի համար 15 ժողովուրդների տոմարների համապատասխանեցման Շիրակացու կատարած մեծ աշխատանքը հարկ է համարել «մարդկության ռիթմիկ հիշողության» պահպանման վիթխարի մի փորձ:

Անանիա Շիրակացու գրչին է պատկանում նաև հռչակավոր տոմարագետ Անդրեաս Բյուզանդացու (IVդ.) տոմարի մեկնությունը, որը բու-

վանդակում է նաև բազմաթիվ տեղեկություններ հայկական օրացույցի մասին: Շիրակացու այս աշխատությունը արժեվորելու համար հարկ է հաշվի առնել այն հանգամանքը, որ Անդրեաս Բյուզանդացու բնագիրը չի պահպանվել:

Ուշագրավ է նաև Շիրակացու բառակազմական և տերմինաշինական գործունեությունը և հատկապես աստղագիտական հասկացությունների մեկնաբանությունն ու ճշգրտումը:

VII դարում Չայ եկեղեցու, հետևապես՝ նաև հայ ազգի համար հրատապ էր քաղկեդոնականության և հակաքաղկեդոնականության «երկխոսությունը»:

Ինչպես հայտնի է, քաղկեդոնականությունը Բյուզանդիայի պետական գաղափարաբանությունն էր, այդ կայսրության աշխարհակալ քաղաքականության կրոնական հզոր կառուցակարգը: Շիրակացին համոզված էր, որ բյուզանդական կայսրության կողմից «երկաբնակության» բանաձևի ընդունումը պայմանավորված էր կայսրության քաղաքական շահերով: Ելնելով դրանից, նա համեմատում է հայոց և հունաց եկեղեցիների դավանաբանական կողմնորոշումները և հաստատում է այն փաստը, որ հայերը Նիկիայի ժողովում ներկա գտնվող եկեղեցու սուրբ հայրերի հետևորդներն են: Մինչդեռ հույները չեն հետևում ճշմարտությանը, այլ միշտ ձգտում են «իշխանության, բռնության և ճարտարության»: «Չայ եկեղեցու հակաքաղկեդոնականությունը» հայ ժողովրդի հոգևոր և դրամով պայմանավորված՝ քաղաքական անկախության ձգտման վառ արտահայտությունն էր:

Շիրակացու աշխարհայացքային և տեսական մեթոդաբանական կարևորագույն սկզբունքները բովանդակում է «Տիեզերագիտություն» անվան տակ հայտնի նրա հիմնական երկասիրությունը: Նրա գրչին է պատկանում նաև «Աշխարհացույց» աշխատությունը, որը իրավամբ համարվում է համաշխարհային աշխարհագրական և քարտեզագրական ժառանգության հայտնի հուշարձան, որում ուսումնասիրվում էր գնդաձև Երկիր մոլորակը՝ տիեզերակարգի հիմնական միավորումներից մեկը: Անանիա Շիրակացին նաև հնագույն մաթեմատիկական մշակույթի վառ ներկայացուցիչն է, ինչի մասին վկայում է մաթեմատիկական մտքի հայտնի պատմաբան Ի. Դեպմանը, «Մաթեմատիկական մշակույթի հնության առումով Սովետական Միության ժողովուրդների մեջ առաջին տեղում են հայերը... (Շիրակացին.- Ռ.Ս.) իր աշխատություններում, բացի զուտ մաթեմատիկական խնդիրներից, արծարծում է

նաև այլ հարցեր՝ երկրի գնդաձևության, Լուսնի և Արեգակի խավարումների, բազմանկյուն թվերի, օրացուցային հաշվումների, արեգակնային ժամացույցների մասին, և այդ ամենը նա արտահայտել է մի դարաշրջանում, երբ եվրոպական ժողովուրդների մոտ գրեթե ոչ ոք այդ հարցերի ուսումնասիրությամբ չեր զբաղվել»⁶։ Անանիա Շիրակացու մաթեմատիկական հմտությունները դրսևորվել են նաև երաժշտական ակուստիկայի ոլորտում։ Հետևելով Դավիթ Անհաղթին և նորապյուրագորական Նիկոմաքոսին՝ նա ստեղծեց «տասնորդական աղյուսակի» հայկական տարբերակը, դրանով իսկ նպաստելով հայ երաժշտագիտության զարգացմանը։

Շիրակացու շնորհիվ ավարտվեց բնագիտության ձևավորումը հայ տեսական-փիլիսոփայական մտքի պատմության մեջ։ Շիրակացու «բնաբանությունը» հիմք հանդիսացավ XI-XV դարերի բնագիտական մտքի համար։ «Շիրակացու բնագիտական աշխարհայացքը հայ փիլիսոփայության մեջ բնագիտական մտքի գրեթե երեք հարյուրամյակների զարգացման, գաղափարների և սկզբունքների ժառանգորդման, ռացիոնալ գիտելիքների տարանջատման երկարատև գործընթացի տրամաբանական արդյունքն է, գործընթաց, որի շնորհիվ «բնաբանությունը» վերածեց հետազոտության հարաբերականորեն ինքնուրույն բնագավառի»⁷։ Սինչդեռ նրա կրթության փիլիսոփայությունը կանխորոշեց միջնադարյան Հայաստանի բարձրագույն և հատկապես՝ բնագիտական-մաթեմատիկական կրթության հետագա զարգացումը։

Համաշխարհային գիտության պատմության ուսումնասիրողների արդարացի վկայությամբ Անանիա Շիրակացին շարունակում է այն գիծը, որը անտիկ բնագիտական մտքի զարգացման համատեքստում նշմարել են Բարսեղ Կեսարացին և Հովնան Փիլոպոնը (VI դար)։ Ընդսմին, Օ. Բորոդինի վկայությամբ, Շիրակացին շատ ավելի մոտ է կանգնած անտիկ գիտության ավանդույթներին, քան ժամանակաշրջանի այլ հեղինակներ⁸։ Անանիա Շիրակացու բնագիտական աշխարհայացքը նշանավորել է գիտափիլիսոփայական մտքի ձևավորման կարևորագույն փուլը, արտահայտել միջնադարյան մտածողության առանձնահատուկ ոճը և կանխորոշել հայ գիտափիլիսոփայական մտքի զարգացման ուղին, ինչպես նաև Հայաստանում բնագիտական կրթության բնույթը։ Շիրակացու աշխատությունները մեծ ազդեցություն են գործել բյուզանդական գիտնականներ Լևոն Մաթեմատիկոսի IX դ. և Նիկողայոս Արտավազդի XIV դ. վրա։

1. Ակնհայտ է այն իրողությունը, որ արդի մարդկության հոգեմտավոր կյանքի վրա բացառիկ ազդեցություն է գործում քաղաքակրթության խորացող ճգնաժամի գիտակցումը: Իր ծայրահեղ ձևերում արդի քաղաքակրթության և մշակույթի «post modern» - ական քննադատությունը ձեռք է բերել «հակափիլիսոփայական փիլիսոփայության» կարգավիճակ: Ուստի Արդիականության առաջնային խնդիրներից մեկն է հոգևոր արժեքների վերականգնացումը, որոնք կնպաստեն «post modern» -ական ժխտողականության հաղթահարումը: Այս խնդիրը կարող է լուծվել փիլիսոփայության «իմաստաստեղծ» գործառույթի շեշտադրման միջոցով: Միաժամանակ ազգի և մարդկության մշակութային ժառանգության պահոցի դեր կատարող փիլիսոփայությունը, այն է՝ փիլիսոփայական մտքի պատմությունը, փոխակերպվում է ազգի և մարդկության Կեցության հոգևոր ոլորտը, դրանով իսկ խթանում պատմական զարգացումը: Փիլիսոփայությունը, այսպիսով, մարդկային համակեցության վայրենացման շարժընթացի հաղթահարման գլխավոր միջոցն է, ազգային մշակույթի բուն առանցքը: Մյուս կողմից, արդի աշխարհում պահանջված մարդկության միասնությունն ու բազմազանությունը ապահովվում է միայն քաղաքակրթությունների երկխոսության միջոցով: Քաղաքակրթությունների երկխոսության գաղափարը ուղղակիորեն հարաբերակցվում է համաշխարհականացման գաղափարի հետ, որն, իր հերթին, ենթադրում է մարդկության մշակութային բազմազանության պահպանումը: Այսպիսով, պատմության հրամայականն է այն ազգերի մշակույթների եթնոպաշտպանական գործառույթների ակտիվացումը, որոնց կենսագործունեության տարածությունը դեռևս վերջնականապես պատահողոված չէ համաշխարհականացման շարժընթացներով և արևմտյան (տեխնոգեն) քաղաքակրթության ակտիվ ներթափանցմամբ: Այդ ազգերի մշակութային հիշողությունը դեռևս կենդանի է և կարող է դառնալ ողջ մարդկության հիշողության վերականգնացման հիմքը: Մշակութային հիշողության հատուկ կենսունակությամբ օժտված ազգերից է և հայ ազգը:

2. Ств. Мирумян Римма. Армянское культурное наследие как механизм самозащиты нации в условиях глобализации (к вопросу о политической концепции культуры) //Армения в диалоге цивилизаций. Материалы

международной конференции. 28 апреля 2011г.- Нижний Новгород: Деком, 2011.-с. 83.

3. Միրումյան Կառլեն, Անանիա Շիրակացի («Իմաստասերք հայոց» մատենաշարից), Երևան, Նոյյան Տապան, 1998, էջ 11-12:

4. Անանիա Շիրակացի, Տիեզերագրություն և տոմար/ Աշխարհ.՝ Ա.Գ. Աբրահամյանի, Երևան, 1940:

5. Հովհաննես Ղրասխանակերտցի, Պատմություն Հայոց, Թիֆլիս, 1912, էջ 92:

6. Деппман И.Я. История арифметики. М., 1959. с. 18. Տես նաև՝ История отечественной математики, М., 1966, էջ 445:

7. Միրումյան Կ. Ա., Անանիա Շիրակացու բնափիլիսոփայությունը // Ս. Ս. Արևշատյան, Կ. Ա. Միրումյան, Հայոց փիլիսոփայության պատմություն. Հին շրջան և վաղ միջնադար, Երևան, 2007, էջ 398:

8. Տես Августин. Творения блаженного Августина. Ч.3.-Киев, 1906, с. 447.